

# KEBAKTIAN ADVEN **KEDUA** KELUARGA BNKP TAHUN 2013

## 1. **Fanunu Lili + Votum**

Tatohugö zui wanunu lili adven iada'a ..

*mutunu lili dua rozi ...*

tandra wa itugu omasi ita wama'anö fa'aurida,  
ba wamaondragö Sangorifi andrö.

Tedou wa'oya lili nitunu, ba tedou göi wa'ebua haga, sanului fa'aurida.

Ba haga soroi Lowalangi, lö tola tabini'ö ita,  
awö gera'erada, awö zi no tafalua.

Ba döi Lowalangi Ama, ba döi NonoNia Yesu Keriso,  
ba ba döi Geheha Ni'amonio.

Yaduhu!

## 2. **Manunö Buku Zinunö No. 367:1** **“Böi Rörö'ö”**

1. Böi rörö'ö, böi rörö'ö, böi rörö'ö, böi rörö'ö talifusö

Ahatö ginötö, ahatö ginötö, ahatö ginötö tohare Yesu andrö

Fa'anö ndra'ugö, röi dödöu si to'ölö

Lö ödönadöna na so Yesu andrö

## 3. **Angerönua**

1. Fombaso Matai'o 25:1-13

2. Fangandrö

3. Fama'ema huhuo

## **MI'AMA'ANÖ, FA LÖ MATE WANDRUMI!**

***Matai'o 25:1-13***

Fa'atohare Yesu ba gulidanö, tefo'eluaha ia göi ba wamaondragö dozi niha, ya'ia ba ginötö we'asoNia si mendrua, ba simanö göi wamaondragöNia dozi niha, ya'ia wa'amate zi samösamösa niha. Da'ö ni'erönusida ba ADVEN si mendrua andre.

Tefodumaduma wa'atohare-Nia andrö, hulö nono alawe, dafulu, samaondragö sangowalu. Lahönagö ira ba wombaloï sangowalu, si möi ba nomo ni'owalu, ba wangai ni'owalu khönia. Ba na i'öhe ni'owalu andrö khönia ba nomonia, ba fao khöra ndraono alawe si dafulu andrö, sanari ba sanunö ba lala.

Ba hiza, tetaha we'aso zangowalu ba wangai ni'owalu khönia. Awena tohare ia ba zi talu mbongi. Me no mufalua gowasa sabata, ba mangawuli zangowalu ba khöra si fao ni'owalu. Ba hiza ndraono alawe si dafulu andrö, si möi mamasao sangowalu ba nomora. Omasi sa ira fefu möi mamasao sangowalu andrö. Ba so i ba gotaluara dalima, zi lö mama'anö fanikha wandru. Moguna sibai wanikha wandru andrö, me ba dalu mbongi mofanö ira. No ogömigömi fasuira, ba tenga göi lala sebolo – salösö lala nitöröra. Si sökhinia na dozi sofanö so wandrunia samösa.

Ba me awena lafa'anö wanikhara si dalima andrö, awena möi ira ba nahia bö'ö wowöli, ba hiza toröi ira furi, Lö tola fao ira khö zangowalu andrö. No ladaridari fofanö sangowalu awö ndraono alawe si dalima si no mama'anö fanikhara.

Börö da'ö, me tohare ira moroi furi zangowalu, ba hiza mbawandruhö nomo zangowalu andrö no muduhö. Labököbökö mbawanduhö andrö, ba lö tebokai sa'ae khöra. No tenga si nangea latötöi ira awö zangowalu, me sagötö ba lala ba lö si fao ira wamasao sangowalu. Börö da'ö göi tenga si nangea ira wefao ba gowasa walöwa andrö ni falua ba nomo zangowalu.

Fe'aso Keriso ba khöda zamösana, ba ginötö wogaoni-Nia ya'ita na irugi inötö wondröida ulidanö andre, alua ba zi lö mudönadöna. Lö irai so zamösa niha sangila inötö da'ö. Ba he no tafa'anö ita wombaloï inötö da'ö, irege tamane ba dödöda: "Gofu hawa'ara manö ginötö nitehe Zo'aya, ba lö fanimbagö khöda, lö tola tafadöni ita ba danga-Nia," ba hiza, lö sa'atö obönö ha fama'anö fombaloï inötö. Hiza i, moguna göi tafa'anö zoguna khöda ba lala ba wangawuli khö-Nia andrö. Iraono alawe si dafulu andrö, ba no lafa'anö ira wombaloï fa'atohare zangowalu. Ba he wa'ae si manö, ba lö sa'atö fefu tola fao ba wa'omuso dödö ba gowasa

walöwa andrö. Hana? Me so ba gotaluara zi lö mangöhönaigö soguna khönia ba lala, ya'ia wanikha wandru andrö.

Famangelama khöda da'ö fefu. Fe'asoda gasagasa ba gulidanö andrö, no inötö ba wama'anö soguna khöda ba lala ba wangawuli khö Nama. Si nangea tatöngöni na'i göi, wa ha gasagasa so noso ba mboto so ginötö da'ö. Ba zi mane aboto ba dödöda niwa'ö Waulo ba Wilifi (2:12): "Mi'alui wangorifimi andrö ba mbanua furi ..." Imane göi Yesu, "Tenga ha ba gönia auri niha, ba ngawalö li fefu si'otara mbawa Lowalangi auri ia" (Mat. 4:4). Amaedola wanikha wandru na tafa'anö göi gö soguna ba wondrou'ö famatida, afu aro,, lö moheu, he na bawa wamaheuheu, ya'ia wamahatö ba daroma li Lowalangi, ba fanaha tödö ba ngawalö wa'afökhö si falukha. Moguna wanörö lala safökhö ba wa'auri andre, ena'ö itugu abe'e ita ba wamati.

Andrö böi arörö ba böi olifu. Dozi sauri moguna aboto ba dödönia, wa so nola we'aso ba gulidanö andre. Ba ba ginötö si lö arara da'ö mohalöwö ita wama'anö, he soguna ba mboto, ba he göi soguna ba noso, ena'ö faoma mofa'abölö, he boto, ba he famati; ena'ö faoma fataha ba ngawalö zanuwö, he sanuwö boto, ba he sanuwö famati, ba sabe'e ba wolawa, he samakao boto ba he samakiko famati.

Si no mama'anö soguna khönia ba wamati, ba lö fa'awuwu furi na so wanandraigö, lö tola l'alani ia afökha andrö. Ha sarörö ba wama'anö soguna ba mboto ba ba wamati, zi möi nifaelungu gafökha. Ba niha si manö teduhö mbawandruhö zorugo. Duma-duma khöda Yesu ba da'ö, me itandraigö la afökha. Me tenga ha ba zoguna ba mboto tetaula dödö Yesu, ba lö aekhu la ba wanandraigö andrö. Ba zi manö göi teboka mbawandruhö zorugo khö-Nia, irege tohare mala'ika ba we'amöi enoni-Nia Mat. 4:17). Da tatohugö halöwö fama'anö andrö, si fao fa'awösa Geheha Keriso, irege na tohare la khöda zamösana, ba lö abu dödöda, me no so khöda haga, ya'ia Keriso. Yaduhu.

#### 4. Fangandrö

*ba mutema'ö faoma sinunö: "Maranata 3 x" (Lala "haleluya 3 x)*  
**"Maranatha" 3x**

**5. Manunö Buku Zinunö No. 367:1  
“Böi Rörö’ö”**

*fangowuloi ame’ela*

2. Böi rörö’ö, böi rörö’ö, böi rörö’ö, böi rörö’ö talifusö  
Ahatö ginötö, ahatö ginötö, ahatö ginötö tohare Yesu andrö  
Botomö, nosomö, fao awö zi so khömö  
Be sumange sauri khö Zo’aya, Sokhö.
3. Böi rörö’ö, böi rörö’ö, böi rörö’ö, böi rörö’ö talifusö  
Ahatö ginötö, ahatö ginötö, ahatö ginötö tohare Yesu andrö  
Faoso’ö, angandrö, tou’ö ba danga Zokhö  
khö Yesu dania gaekhuta nosomö

**6. Fangandrö (doa syafaat)  
Fangandrö Zo’aya**

**7. Howuhowu**

Yafalukha ita fefu wa’ebua dödö Zo’aya ya’ita Yesu Keriso,  
Fa’omasi Lowalangi Ama, ba Fa’awösa Geheha Ni’amoni’ö.  
Yaduhu!

**8. Manunö Buku Zinunö No. 349:1  
“Ibase’ö Banua-Mö”**

1. Ibase’ö banua-Mö, wangawuli-U, So’aya  
Gasagasa we’asoMö, damataha dödöma  
Ya Ö’faondragö ndra’aga, na tohare’Ö dania  
Omusoi’ö dödöma, Omusoi’ö dödöma

**9. Ya’ahowu**

*Bersalam-salaman*

**Selamat Adven **Kedua** 2013**